


# TEZAU LITURGIC

## 10 APRILIE

# ACATISTUL SF. IERARH-MUCENIC MISAIL, ARHIEPISCOPUL RIAZANULUI



MOSCOVA, 2000



# **Акафист**

## **священномученику**

## **Мисаилу, архиепископу**

## **Рязанскому и Муромскому**

### **Кондак 1**

Избранный учениче Христов, заступниче земли Российския, славяще мученическую кончину твою, воспеваем ти похвальная. Ты же, стрелами уязвленный, от вражиих нас стрел свободы, да со умилением и радостью зовем ти: Радуйся, священномучениче Мисаиле, о спасении душ наших небесный ходатаю.

### **Икос 1**

Ангелов лица возликоваша, егда ты, священномучениче Мисаиле, словеса Господни «идите, научите вся языки, крестяще их во имя Отца и Сына и Святаго Духа» всею душею твоею воспринял еси и, яко апостол Павел, на проповедание Божия словесе трици текл еси, светом Евангельским к животу вечному заблуждших просвещая и научая нас вопити тебе сице: Радуйся, деяниям великаго Павла подражавый; Радуйся,

венец Царствия Небеснаго стяжавый. Радуйся, премудрость паче мудрейших мира сего имевый; Радуйся, сущих во мразе идолослужения теплотою Евангелия согреть. Радуйся, чистаго и непорочнаго жития насадителю; Радуйся, пагубнейшаго пьянства обличителю. Радуйся, о Торжестве Православия в стране Российской радевый; Радуйся, подвиги твоя мученическою кончиною запечатлевый. Радуйся, священномучениче Мисаиле, о спасении душ наших небесный ходатаю.

### **Кондак 2**

Видя паству твою Рязанскую от Истиннаго Бога отступившу и в бесовство языческое впадшу, святителю Мисаиле, о спасении ввереннаго ти словеснаго стада возревновал еси, да изыдут из мрака заблуждений своих и купно с тобою сподобятся пети Христу: Аллилуиа.

### **Икос 2**

Разумом небесным просвещаемъ, об избрании достойных пастырей для Церкви Христовы заботился еси, святе Мисаиле, да напаяют человеки ученьми Божественными, возвещающе всем свет Христа

спасительный и веру в Него правую. Мы же ублажаем подвиги твоя и сие тебе зовем: Радуйся, Таин Божиих премудрый устроителю; Радуйся, идолослужения низложителю. Радуйся, иго Христова, легкое и благое, с радостью понесый; Радуйся, непобедимою и непостижимою силою Креста Христова вооруживыйся. Радуйся, в броню веры Христовы облеченный; Радуйся, благодатию, яко щитом, защищенный. Радуйся, житием непорочным козни диавола посрамивый; Радуйся, оружием Божиим князя мира сего победивый. Радуйся, священномучениче Мисаиле, о спасении душ наших небесный ходатаю.

### **Кондак 3**

Силою словесе твоего и властью святительскою потщался еси, архиерею Божий, благочестие насадить в пределах Рязанских. Паче же противу пагубнаго недуга пьянства вооружился еси. Темже страстию винопития одержимым исцеления подаеши и учиши пети Богови: Аллилуиа.

### **Икос 3**

Имея тщание веру Православную укрепить, водосвятную чашу во храм

Успения Пресвятыя Богородицы к мощем  
 Первосвятителя Рязанскаго Василия  
 приложил еси, да вси, пред честными его  
 мощми молебная пения совершающе,  
 сподобятся прияти исцеления недугов  
 душевных и телесных. Ныне же купно со  
 святителем Василием у Престола Божия  
 предстоиши и молитвы за род  
 христианский возносиши, нас же научаеши  
 вопити тебе: Радуйся, благолепия храмов  
 Божиих неустанный содетелью; Радуйся,  
 делания заповедей Христовых  
 благочестивый радетелю. Радуйся, душу  
 твою за други положить готовый; Радуйся,  
 блуждающих во тме греховней наставниче.  
 Радуйся, от грехов воздержанием праздники  
 нас освящати научаяй; Радуйся, безчинств  
 хранитися нам повелеваяй. Радуйся, зверю  
 душегубительному паству расхитити не  
 попускаяй; Радуйся, стада Христова  
 пастырю добрый и многомилостивый.  
 Радуйся, священномучениче Мисаиле, о  
 спасении душ наших небесный ходатаю.

#### **Кондак 4**

Бурю страстей, души ревнителей  
 «старины» обдержажих, вкупе с Патриархом  
 Никоном умиряя, священномучениче

Мисаиле, к единству церковному звал еси. Укрепи и нас в Православии и единомыслии, тебе зовущих: Аллилуиа.

#### **Икос 4**

Слыша глас Господень, глаголющ: «Приидите ко Мне вси труждающиеся и обремененнии, и Аз упокою вы», с радостию Христу последовал еси, мир греховный подвиги твоими распиная и сам миру распинаясь. Темже дух мирен стяжал еси и множество заблудших от вечныя погибели исхитил еси, научая нас не усты токмо, но всем житием Господеви служить и тебе глаголати: Радуйся, нищету духовную стяжавый и о гресех своих плакавый; Радуйся, кротостию Ангелов удививый и Правды Божия алкавый. Радуйся, яко дела милосердия скорбящих и страждущих согрел еси; Радуйся, яко читсым сердцем Бога узрел еси. Радуйся, миротворче, яко сын Вышняго нареклся еси; Радуйся, от языческих жрецов оклеветанный. Радуйся, правды ради Божия от нечестивых убиенный; Радуйся, яко мзда твоя многа на небесех. Радуйся, священномучениче Мисаиле, о спасении душ наших небесный ходатаю.

## **Кондак 5**

Божественный свет в непорочный сосуд души твоея, священномучениче Мисаиле, достойно приемый, во тме идолопоклонства сидящих просветити потщался еси и, Богу содействующу, во град Касимов стопы твоя направил еси, вопия Господеви: Аллилуиа.

## **Икос 5**

Видяще тя иновернии, яко боготечную звезду, к горнему Иерусалиму путеводящу и добродетельми светло сияющую, с любовью последоваху тебе, внимающе словесем душеполезным. Ты же царевича Сибирскаго и царевича Касимовскаго и с ними многия во имя Пресвятыя Троицы крестил еси, Юже умоли, да не осудити по грехом нашим, взывающих ти: Радуйся, души темныя светом Христовым просветивый; Радуйся, пределы Касимовския учением Евангельским огласивый. Радуйся, злобу вражью кротостию Христовою укротивый; Радуйся, многия души к познанию Сына Божия приведый. Радуйся, языки от рабства диаволу избавивый; Радуйся, образ добродетельнаго жития всем показавый. Радуйся, Божественных словес немолчный проповедниче; Радуйся, ищущих спасения



дивный                      наставниче.                      Радуйся,  
священномучениче Мисаиле, о спасении  
душ наших небесный ходатаю.

### **Кондак 6**

Проповедию словес Евангельских, учащих  
не на песце, но на камени храмину души  
своея строить, просветил еси страну  
Касимовскую, священномучениче Мисаиле,  
и надал еси ю на незыблемом Христовы  
веры камени. Сподоби и нас в Православии  
незыблемо пребыти до конца живота  
нашего, да возможем достойно пети  
Создателю нашему небесную песнь:  
Аллилуиа.

### **Икос 6**

Возсия в тебе, святе Мисаиле, Боголепное  
светило землям Шацким, ихже, возвещая  
спасительную веру во Христа Иисуса, обтекл  
еси и к плодоносию духовному оросил еси.  
Темже благохвалим тя, проповедника  
Божественнаго, похвалами сими: Радуйся,  
непобедимою верою вооружен бывый;  
Радуйся, в проповеди Евангелия ревность  
велию явивый. Радуйся, древняя вражды  
идолослужительныя потребителю; Радуйся,  
лжи диавольския низложителю. Радуйся, к

Богу любовью горевый; Радуйся, горе очи твои имевый. Радуйся, молитвою весь мир объявый; Радуйся, заблуждшим путь ко спасению указавый. Радуйся, священномучениче Мисаиле, о спасении душ наших небесный ходатаю.

### **Кондак 7**

Хотя просветити языки светом истиннаго Боговедения, якоже и первоверховный апостол Павел, ко язычником неленостно многия труды подъял еси во благовестии Христове. Сподоби и нас, грехми разслабленных, во еже единого от грешник обратити, темже убо спасти от смерти души наша, да Богови в молитве вопием: Аллилуиа.

### **Икос 7**

Новыя творения во Христе яви Бог чада твоя новопросвещенная. Темже и ныне души, во гресех погибающия к милосердному Господу зовещи, да во смирении покаяние принесут и, радуящеся благому пременению сему, благочестно воззовут ти: Радуйся, Церкви Соборная и Апостольския велие украшение; Радуйся, души грешник наставляяй ко благочестию

во спасение. Радуйся, спасение душ  
человеков паче живота возлюбивый;  
Радуйся, язвы Христа Бога на теле своем  
носивый. Радуйся, языческая тмы  
светозарный просветителю; Радуйся, уз  
греховных разрешителю. Радуйся, народом  
диким житие ангельское показавый;  
Радуйся, яко апостол, веру Евангельскую  
благовестивый. Радуйся, священномучениче  
Мисаиле, о спасении душ наших небесный  
ходатаю.

### **Кондак 8**

Странническое житие на земли прешел  
еси, священномучениче Мисаиле, не ведый  
покоя в трудах твоих, не тленного богатства  
ища, но небеснаго взыскуя, идеже ни червь,  
ни тля тлит и идеже татие не подкопывают,  
ни крадут. Сего ради ныне веселишия в  
обителях небесных, выну поя Богови:  
Аллилуиа.

### **Икос 8**

Всем сердцем, всею душою, всею  
крепостию и всем разумением твоим  
возлюбив Господа, священномучениче  
Мисаиле, возлюбил еси ближних и дальних,  
яко самого себе. Темже убо душу твою за

други положити изволил еси. Мы же, таковой твоей любви дивящися, возглашаем ти сицевыя хвалы: Радуйся, светильниче любви, от Пресвятыя Троицы возсиявый; Радуйся, в незлобии Христу последовавый. Радуйся, милосердие Пречистыя Девы стяжавый; Радуйся, исповеданию Бога тезоименитый. Радуйся, целомудрия ангельскаго носителю; Радуйся, Царствия Божия усердный взыскателю. Радуйся, святительскими молитвами паству ограждавый; Радуйся, в подвизех преподобным подражавый. Радуйся, священномучениче Мисаиле, о спасении душ наших небесный ходатаю.

### **Кондак 9**

Все естество ангельское удивися, яко ты, священномучениче Мисаиле, паки потекл еси мордве, идолом служащей, свет Божественныя Истины возвещати, да и тии, вернии обретшися, возславят силу Божию и воспоют хвалебную песнь: Аллилуиа.

### **Икос 9**

Витии от жрецов языческих воздвигоша на тя гонение лютое, и мнози от нечестивых обступisha тя, смерти твоея ищуще. Ты же,

яко Агнец Божий, кротко молился еси: «Отче, отпусти им, не ведают бо, что творят». Таковую кончину твою воспоминающе, почитаем страдания твоя и зовем ти таковая: Радуйся, в кротости и смирении Христу Богу подражавый; Радуйся, яко и Божественный Страдалец, сердце отверстое имевый. Радуйся, стрелами, якоже и Он гвоздем, ко кресту исповедания пригвожденный; Радуйся, душу твою сохранивый и спасый. Радуйся, Страстем Христовым общниче; Радуйся, святых мучеников наследниче. Радуйся, яко страданием своим безстрастие приял еси; Радуйся, яко мученическую кончиною живот вечный стяжал еси. Радуйся, священномучениче Мисаиле, о спасении душ наших небесный ходатаю.

### **Кондак 10**

Спасительного подвига твоего достигл еси скончания, священномучениче Мисаиле. Мы же место страданий твоих, освященное честною твоею кровию, с любовью чтуще, выну тепле Богови вопием: Аллилуиа.

## Икос 10

Предстательство святителя Николая яко стену заступления имевый, в твердости исповедания Православия ему подражал еси. Темже дух твой близ обители, в честь святителя Мирликийскаго освященныя, в обители вечныя отшел еси. Мы же, таковому о тебе Божию благоволению дивящися, вопием ти: Радуйся, Евангелия Христова усердный благовестниче; Радуйся, Церковных преданий твердый хранителю. Радуйся, благочестия добрый сеятелю; Радуйся, мрежею проповеди твоея языки во спасение уловивый. Радуйся, во глубину смирения возшедый; Радуйся, за обидащих тя усердно моливыйся. Радуйся, от нечестивых люте убиенный; Радуйся, нетлением мощей от Господа почтенный. Радуйся, священномучениче Мисаиле, о спасении душ наших небесный ходатаю.

## Кондак 11

Пение всеумиленное иереи и людие принесоша Богови, егда видеша тело твое, тлению не причастное, и лице твое, яко лице Ангела, сияющее, о тебе же Господеви воспеша: Аллилуиа.

## Икос 11

Светоподательна светильника житию  
твоему имея Архистратига Сил Божиих,  
вопиющего «кто яко Бог», в соборе во имя  
Архангела Михаила в кремле Рязанстем  
мощми твоими упокоился еси. В нем же  
последи паки тыя нетленны обретшися, во  
обитель Троицкую пренесены быша,  
воздвизающия верных глаголати тебе  
таковая: Радуйся, яко со Архангелы ныне  
ликуеши; Радуйся, яко иноком, чину  
ангельскому, добрый путь  
указуеши. Радуйся, подвижающимся выну  
помогай; Радуйся, нерадивых от сна  
греховнаго пробуждаяй. Радуйся, благий и  
милостивый скорбящих утешителю;  
Радуйся, скоропредстательный  
бедствующих помощниче. Радуйся, струями  
благодати сердца напояй; Радуйся, словесы  
Божии верныя преизобильно насыщаяй.  
Радуйся, священномучениче Мисаиле, о  
спасении душ наших небесный ходатаю.

## Кондак 12

Благодатныя струи исцелений источают  
честныя мощи твоя, священномучениче  
Мисаиле, к нимже, на всякое время  
притекающе, духовне и телесне недугующии

получают исцеления и зовут Богови: Аллилуиа.

### **Икос 12**

Поюще Богоугодное житие твое, священномучениче Мисаиле, молим тя: умоли Живоначальную Троицу, да оросит Духом Святым землю сердец наших, да принесем Господеви плод сторичный и, горяще любовью к памяти твоея, возовем тако: Радуйся, на небеси и на земли прославленный; Радуйся, к вечней жизни предуставленный. Радуйся, страсти побеждати научая; Радуйся, немощную волю нашу укрепляя. Радуйся, Богови даже до смерти послуживый; Радуйся, в напастех вражиих ко Христу прибегати нас научивый. Радуйся, храмов и обителей неотступный хранителю; Радуйся, земли Российския Богом данный покровителю. Радуйся, священномучениче Мисаиле, о спасении душ наших небесный ходатаю.

### **Кондак 13**

О всеблаженный угодниче Божий, всякия почести достойный, священномучениче Мисаиле! Услыши малое моление наше, от любви усердная ти приносимое, и сподоби



ны обрести благодать у Господа, умоли Его благость помиловати ны, да сподобимся с тобою и всеми святыми купно Ему пети: Аллилуиа, Аллилуиа, Аллилуиа.

(Этот кондак читается трижды, затем икос 1 и кондак 1)

### **Молитва**

О пресветлый светильниче Церкви Христовы, священномучениче Мисаиле, светом веры Православных вся концы земли Российския озаривый и мечем словесе Божия смущения и шатания хульная угасивый, во тме язычества блуждающих просветивый, душу за Христа предавый и кровию твоею пажить Его удобривый! Молим тя, похвало Российская, в чудесех нетления возсиявый: ходатайствуй о нас, грешных и смиренных, пред Престолом Вседержителя Бога, да укрепит ны в Православии и единомыслии, и непоколебимем даже до смерти исповедании веры Христовы. Моли Христа Бога, да отпустит нам согрешения наша вольная и невольная, да избавит ны от враг видимых и невидимых; да соблюдет Церковь Свою незыблему от неверия, суеверия, ересей и раскола; да дарует нам

вся ко временней и вечней жизни  
потребная. К тебе припадаем и молимся:  
всели в сердца наша любовь твою, еюже к  
Богу и ближним твоим в житии твоём  
преисполнен был еси, источи цельбы  
притекающим к тебе с верою. Сущия в  
скорбех, печали, болезни душевной и  
телесней заступи и защити; понеси немощи  
наша, не отлучайся духом от нас, да  
помирует Господь нас молитв твоих ради.  
Испроси, угодниче Христов, да милостив  
будет нам Господь zde и в будущем веце, и  
да преставльшиися от нас отцы и братию,  
матери и сестры и чада наша в лице святых  
вчинив, в месте светле упокоит. Предстояще  
и поклоняющеся раце святых мощей твоих,  
во всечестней обители сей почивающих,  
имамы тя неусыпающа молитвенника и  
предстоятеля о нас ко Господу и к Царствию  
Небесному путеводителя. Темже благодарне  
с тобою и всеми святыми купно величаем в  
Троице славимаго Бога, Отца и Сына и  
Святаго Духа, ныне и присно и во веки  
веков. Аминь.